



**ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ ԲԱՐՁՐ ՏԵԽՆՈԼՈԳԻԱԿԱՆ
ԱՐԴՅՈՒՆԱԲԵՐՈՒԹՅԱՆ ՆԱԽԱՐԱՐ**

Հ Ր Ա Մ Ա Ն

“ 02 ” Մարտի 2023 թվական

N 423-24

ք. Երևան

**«11009 ՁԵՌՆԵՐԵՑՈՒԹՅԱՆ ՏԵԽՆՈԼՈԳԻԱԿԱՆ ԷԿՈՀԱՄԱԿԱՐԳ»
ՄԻՋՈՑԱՌՄԱՆ ԾՐԱԳԻՐԸ ՀԱՍՏԱՏԵԼՈՒ ՄԱՍԻՆ**

Ղեկավարվելով ՀՀ կառավարության 2022 թվականի դեկտեմբերի 29-ի «Հայաստանի Հանրապետության 2023 թվականի պետական բյուջեի կատարումն ապահովող միջոցառումների մասին» N 2111-Ն որոշման 13-րդ կետի 1-ին ենթակետի «գ» պարբերությամբ՝

ՀՐԱՄԱՅՈՒՄ ԵՄ՝

1. Հաստատել՝

- 1) 2023 թվականի «11009 Ձեռներեցության տեխնոլոգիական էկոհամակարգ» միջոցառման ծրագիրը (այսուհետ՝ Ծրագիր)՝ համաձայն հավելված 1-ի,
- 2) Ծրագրի 2023 թվականի ֆինանսական միջոցների բաշխվածությունը՝ համաձայն հավելված 2-ի:

2. Սույն հրամանի կատարման նկատմամբ հսկողությունը վերապահել ՀՀ բարձր տեխնոլոգիական արդյունաբերության նախարարի տեղակալ Դավիթ Սահակյանին:

X

ՌՈԲԵՐՏ ԽԱՉԱՏՐՅԱՆ

Signed by: KHACHATRYAN ROBERT 4010840706



ՌՈԲԵՐՏ ԽԱՉԱՏՐՅԱՆ

2023 ԹՎԱԿԱՆԻ ԾՐԱԳԻՐ
«11009 ՁԵՌՆԵՐԵՑՈՒԹՅԱՆ ՏԵԽՆՈԼՈԳԻԱԿԱՆ ԷԿՈՀԱՄԱԿԱՐԳ» ՄԻՋՈՑԱՌՄԱՆ

Բովանդակություն

Հիմնախնդիր.....	2
Ծրագրի նպատակ	2
Ծրագրի նկարագրություն	3
Բաղադրիչ 1. «Գաղափարից մինչև բիզնես» դրամաշնորհներ	3
1 «Գաղափարի փուլ»	4
2 «Մուտք դեպի շուկա փուլ»	4
Բաղադրիչ 2. Ինկուբացիոն և աքսելերացիոն հնարավորությունների ստեղծում.....	6
Բաղադրիչ 3. Տաղանդի ներգրավման բաղադրիչ.....	7
Բաղադրիչ 4. Թեմատիկ միջոցառումների անցկացում.....	7
Բաղադրիչ 5. Համագործակցություն հայկական աքսելերատորների հետ	8
2021-22թթ. ընթացքում տրամադրված դրամաշնորհների մնացորդի մարում	8
Ծրագրի սկզբունքները	9

1. Հիմնախնդիր

1. Ծրագրի մշակման հիմքում ընկած են ՀՀ կառավարության 2021 թվականի օգոստոսի 18-ի «Հայաստանի Հանրապետության կառավարության ծրագրի մասին» N 1363 որոշման հավելվածի 2.3-րդ կետով սահմանված նպատակները, որոնց համաձայն ՀՀ կառավարությունը շարունակելու է նպաստել նորարարական համակարգի զարգացմանը և տարբեր ոլորտներում համակողմանի ներդրմանը: Նորարարական համակարգի զարգացման գործընթացում առանցքային և նշանակալի դեր ունի ձեռնարկատիրական էկոհամակարգի կայացումը, քանի որ տնտեսությունում նորարարության հիմնական շարժիչ ուժերից են ձեռներեցները, որոնց կողմից գիտական արդյունքները և նոր գաղափարները առևտրայնացվում են ու ստեղծում նոր արժեք տնտեսությունում:

2. Մի շարք ոլորտային ուսումնասիրություններ¹ փաստում են, որ հայաստանյան ձեռնարկատիրական համակարգի բացերից են ձեռնարկատիրական կրթությունը, ձեռներեցության ֆինանսավորումը, տեխնոլոգիական ինկուբատորների և արքսելերատորների կայացման ցածր մակարդակը, ինչպես նաև կարևորում են կառավարության կողմից ներդրվող ծրագրերի անհրաժեշտությունը, որոնք կնպաստեն ձեռներեցության խթանմանը: Նշված համակարգային խնդիրների լուծման նպատակով ՀՀ բարձր տեխնոլոգիական արդյունաբերության նախարարության կողմից 2023 թվականի ընթացքում նախատեսվում է շարունակել «Ձեռներեցության տեխնոլոգիական էկոհամակարգ» միջոցառումը:

2. Ծրագրի նպատակ

3. Ծրագրով նախատեսվում է խթանել Հայաստանի ազգային նորարարական համակարգի զարգացումը, ստեղծել անհրաժեշտ ինովացիոն միջավայրը նոր ընկերությունների ձևավորման ու առաջընթացի համար, այդպիսով՝ նպաստել նաև մարդկային կապիտալի զարգացմանը:

4. Ծրագիրը նպատակ ունի պետական միջամտությամբ լրացնելու հայաստանյան նորարարական համակարգում առկա բացերը՝ սկսելով թույլ զարգացած օղակներից: Մասնավորապես, նախատեսվում է սկսնակ տեխնոլոգիական ընկերություններին և թիմերին ապահովել ֆինանսավորման և աճի հնարավորություններով, ինչպես նաև ստեղծել նոր գիտելիքի ներհոսքի հնարավորություններ: Ծրագրի վերջնարդյունքում ակնկալվում է ունենալ տեխնոլոգիական սկսնակ ընկերություններ, որոնց որոշակի մասը պատրաստ կլինի ներդրողներից ներդրումներ ներգրավել:

¹ ԵՏՀ ՄԱԿ (2020). Նորարարության քաղաքականության պատկերը Արևելյան Եվրոպայի և Հարավային Կովկասի երկրների համար

Ամերիա ՓԲԸ (2020). Ձեռնարկատիրության Համաշխարհային Ձեկույց Հայաստան 2019/2020

3. Ծրագրի նկարագրություն

5. Ծրագիրը բաղկացած է փոխկապակցված 5 ենթածրագրերից (բաղադրիչներից):

6. Բաղադրիչ 1. «Գաղափարից մինչև բիզնես» դրամաշնորհներ

ՀՀ բարձր տեխնոլոգիական արդյունաբերության նախարարությունը «Գաղափարից մինչև բիզնես» ծրագրի միջոցով ֆինանսավորում կտրամադրի սկսնակ տեխնոլոգիական ընկերություններին և գիտահետազոտական թիմերին առևտրայնացնելու իրենց գաղափարները և նոր արժեք ստեղծելու տնտեսությունում:

Ծրագիրը նպատակ ունի նաև հանրայնացնել ձեռներեցության գաղափարը, բարձրացնել դրա նկատմամբ հետաքրքրվածությունը՝ վաղ շրջանում գտնվող և արդեն իսկ կայացած ընկերություններին ու հետազոտական խմբերին դրամաշնորհների տրամադրման միջոցով, ինչպես նաև խթանել բարձր տեխնոլոգիական լուծումների կիրառմամբ երկրում առկա սոցիալ-տնտեսական խնդիրների լուծումը՝ միաժամանակ հզորացնելով Հայաստանի Հանրապետության ձեռնարկատիրական էկոհամակարգը: Այդ նպատակով մշակվել է «Գաղափարից մինչև բիզնես» դրամաշնորհային ծրագիրը, որի բաղադրիչների իրականացումը ՀՀ ստարտափ և ինժեներական էկոհամակարգի ընկերություններին թույլ կտա հաղթահարել առկա մարտահրավերները: Ծրագրի շրջանակներում կտրամադրվեն նաև խորհրդատվական, ինկուբացիոն և աքսելերացիոն աջակցություն, ինչը կնպաստի դրամաշնորհ ստացած ընկերությունների կայուն զարգացմանն ու ձեռնարկատիրական հմտությունների ամրապնդմանը:

Ծրագրի հանրայնացման և տեղեկացվածության բարձրացման նպատակով նախատեսվում է այցեր կատարել Հայաստանի բարձրագույն ուսումնական հաստատություններ, մասնավորապես՝ դրանց բնագիտական ֆակուլտետներ, և ներկայացնել ծրագիրը: Նախատեսվում է նաև համագործակցել էկոհամակարգի այլ մասնակիցների հետ՝ ներգրավելու խոստումնալից թիմեր և գաղափարներ:

Դրամաշնորհներն ընկերություններին հնարավորություն կտան կայանալ և ապագայում ավելի գրավիչ ու վստահելի դառնալ վենչուրային ներդրումների, բանկային վարկավորման կամ պատվիրատուների համար: Սա նաև կօգնի աշխուժացնել ՀՀ վենչուրային կապիտալի շուկան:

Ծրագրի անուղղակի նպատակներից է նաև դրամաշնորհային ծրագրի ներուժի լիարժեք իրացումը: Այդ իսկ պատճառով բանակցություններ կանցկացվեն անհատ ներդրողների, առկա վենչուրային ընկերությունների և այլ շահագրգիռ կողմերի հետ՝ համաֆինանսավորվող դրամաշնորհներ տալու կամ մրցույթում չհաղթած ընկերություններին աջակցելու նպատակով:

Էկոհամակարգի մասնակիցներին և ոլորտային մասնագետներին առնվազն նախատեսվում է ներգրավել դրամաշնորհների տրամադրման որոշումների կայացման ժամանակ:

Ծրագրի շրջանակներում կիրականացվի երկու ուղղություններով դրամաշնորհներ՝ «Գաղափարի փուլ» և «Մուտք դեպի շուկա փուլ»:

1) «Գաղափարի փուլ»

Բաղադրիչի շրջանակում նախատեսվում է դրամաշնորհների տեսքով ֆինանսավորում տրամադրել գաղափարի փուլում գտնվող սկսնակ ընկերություններին, որոնց կողմից ներկայացվող արտադրանքի և (կամ) ծառայության գաղափարը միտված է բարձր տեխնոլոգիաների ոլորտում նոր արժեքի ստեղծմանը և (կամ) տեխնոլոգիաների կիրառմամբ արդի խնդիրների և մարտահրավերների լուծմանը: Դրամական հատկացման բյուջեի առավելագույն չափը կազմում է 150,000,000 (հարյուր հիսուն միլիոն) ՀՀ դրամ, որը նախատեսվում է բաշխել մրցույթը հաղթահարած ընկերությունների միջև (յուրաքանչյուրին՝ մինչև 5,000,000 (հինգ միլիոն) ՀՀ դրամ):

Օգտակար կարող են համարվել այն մտահղացումներն ու տեխնոլոգիական լուծումները, որոնք կկարողանան արդիականացնել ծառայությունների մատուցման որևէ ոլորտ՝ պետական կամ մասնավոր հատվածներում, թվայնացման, առողջապահական, գյուղատնտեսական և կրթական ոլորտներում, կամ տեխնոլոգիական լուծման շնորհիվ նպաստել սոցիալական նշանակություն ունեցող խնդիրների լուծմանը՝ բանակում, դպրոցներում, կրթական ոլորտում, հիվանդանոցներում, հյուրընկալության և էկոտուրիզմի, վերականգնվող էներգիայի, շրջակա միջավայրի պահպանության ոլորտներում և այլն:

2) «Մուտք դեպի շուկա փուլ»

Բաղադրիչի շրջանակում նախատեսվում է դրամաշնորհների տեսքով ֆինանսավորում տրամադրել շուկա մուտք գործելու փուլում գտնվող ընկերություններին, որոնց կողմից ներկայացվող արտադրանքի և (կամ) ծառայության նախատիպը միտված է բարձր տեխնոլոգիաների ոլորտում նոր արժեքի ստեղծմանը և տեխնոլոգիաների կիրառմամբ արդի խնդիրների և մարտահրավերների լուծմանը: Դրամական հատկացման բյուջեի առավելագույն չափը կազմում է 200,000,000 (երկու հարյուր միլիոն) ՀՀ դրամ, որը նախատեսվում է բաշխել մրցույթը հաղթահարած ընկերությունների միջև (յուրաքանչյուրին՝ մինչև 10,000,000 (տասը միլիոն) ՀՀ դրամ):

Վերոնշյալ երկու դրամաշնորհային մրցույթների հայտերն ընդունվելու են առցանց եղանակով. ARMEPS էլեկտրոնային համակարգի միջոցով մասնակիցը ներկայացնում է պահանջվող փաստաթղթերը և նկարագրում իր ամբողջ գաղափարը:

Հայտերի գնահատումն իրականացվում է երկու փուլով. առաջին փուլի ընթացքում Նախարարության ներկայացուցիչներից և փորձագետներից կազմված թիմը գնահատում է մասնակցի համապատասխանությունը մրցութի չափորոշիչներին: Գնահատման առաջին

փուլը հաղթահարած մասնակիցները իրավունք են ունենում մասնակցել երկրորդ՝ պատկերավոր ներկայացման փուլին, որի ընթացքում մասնակցին տրվելու է 3 թույլ ժամանակ՝ ներկայացնելու իր գաղափարը:

Երկրորդ փուլի համար ստեղծվում է նախարարության գնահատող հանձնաժողով (հետագայում՝ հանձնաժողով) և ինկուբատորների և աքսելերատորների ներկայացուցիչների թիմ (հետագայում՝ թիմ):

Պատկերավոր ներկայացումն ավարտելուց հետո հանձնաժողովն ու թիմը իրականացնում են հարց ու պատասխան մասնակցի հետ, որի համար հատկացվում է 10-15 թույլ ժամանակ: Հարց ու պատասխանի ավարտից հետո հանձնաժողովի անդամները իրականացնելու են գնահատում նախօրոք սահմանված չափորոշիչների հիման վրա:

Թիմի անդամները հնչեցնում են իրենց կողմից մասնակցին առաջարկվող աջակցության և համագործակցության պայմանները:

Մասնակցին հնարավորություն է տրվում ընտրություն կատարել, թե որ ինկուբատորի կամ աքսելերատորի հետ է նախընտրում աշխատել և ինչու:

Դրամաշնորհի ստանալու համար պարտադիր պայման է որևէ ինկուբատորի կամ աքսելերատորի հետ համագործակցելը: Համագործակցությունից հրաժարվելը կարող է դիտարկվել որպես դրամաշնորհից հրաժարում:

Մասնակցի կողմից կայացված որոշումից հետո Հանձնաժողովը ներկայացնում է իր գնահատականը:

Եթե Մասնակիցը և որևէ ինկուբատոր կամ աքսելերատոր համագործակցության պայմանավորվածություն են ձեռք բերել, և գնահատող Հանձնաժողովը դրամաշնորհի տրամադրման դրական որոշում է կայացրել, ապա Մասնակիցը ստանում է դրամաշնորհը:

Մասնակիցը պարտավորվում է ստացված դրամաշնորհի շրջանակներում իրականացնել ծրագիրը և նախարարություն ներկայացնել համապատասխան հաշվետվությունները: Ընդ որում, այդ հաշվետվությունը պետք է հաստատվի նաև գործընկեր ինկուբատորի կամ աքսելերատորի կողմից:

Ինկուբատորը կամ աքսելերատորը պարտավորվում է պայմանավորված աջակցությունը տրամադրել Մասնակցին և դրա հաշվետվությունը ներկայացնել Նախարարությանը: Ընդ որում, այդ հաշվետվությունը պետք է հաստատվի նաև Մասնակցի կողմից:

3) Ինկուբատորներ և աքսելերատորներ

Ինկուբատորների և արքսելերատորների կազմում ներգրավված են ՀՀ ստարտափ էկոհամակարգը ներկայացնող ինկուբացիոն և արքսելերացիոն գործունեություն ծավալող ընկերությունների ներկայացուցիչները: Ինկուբատորները և արքսելերատորները նախապես Նախարարություն են ներկայացնում ստարտափ ընկերություններին տրամադրվող աջակցության գործիքակազմը և համագործակցության պայմանները:

7. Բաղադրիչ 2. Ինկուբացիոն և արքսելերացիոն հնարավորությունների ստեղծում

Շարունակելով ստարտափի զարգացման շղթայի տրամաբանությունը՝ ծրագրի երկրորդ բաղադրիչով նախատեսվում է սկսնակ ընկերությունների և թիմերի աճի համար համապատասխան ենթակառուցվածքների ապահովում: Բաղադրիչի հիմնական նպատակն է լրացնել ձեռնարկատիրական համակարգում առկա բացերը՝ կապված սկսնակ ընկերության զարգացման համար անհրաժեշտ գիտելիքի և հմտությունների հետ, որոնք ֆինանսական ռեսուրսների հասանելիության հետ միասին կարող են առաջընթաց ապահովել տեխնոլոգիական համակարգում:

Այս բաղադրիչով առաջարկվում է ոլորտի առաջատար կազմակերպությունների (կրթական հաստատություններ, ինկուբատորներ, արքսելերատորներ և այլն) հետ համագործակցության միջոցով գիտական և տեխնոլոգիական հիմքով ստարտափերի համար մշակել և ապահովել իրենց կարիքներին համապատասխան ինկուբացիոն և արքսելերացիոն բնույթի ծրագրեր: Նման ծրագրերը կաջակցեն սկսնակ ընկերություններին և թիմերին՝ խթանելով իրենց աճի տեմպը, թիմի անդամներին ապահովելով անհրաժեշտ գիտելիքներով և հմտություններով նախատիպերի մշակման, բիզնես մոդելավորման, ֆինանսական պլանավորման, աճի ռազմավարությունների մշակման, ներդրողների առջև գործարար ծրագրի ներկայացման և այլ ուղղություններով:

Վերոնշյալ նպատակներին հասնելու համար կանցկացվեն մրցույթներ, որոնց շրջանակում ֆինանսական միջոցներ կհատկացվեն այն կազմակերպություններին, որոնք կմշակեն և կանցկացնեն շահառու ընկերությունների և թիմերի հետագա աճին նպաստող ինկուբացիայի, արքսելերացիայի, բիզնես խորհրդատվության և աջակցության ծրագրեր:

Վերոնշյալ ծրագրերի համար առաջնային թիրախային խումբ կդիտարկվեն ՀՀ բարձր տեխնոլոգիական արդյունաբերության նախարարության կողմից իրականացված դրամաշնորհային ծրագրերի շահառուները, վերջիններիս՝ դեպի շուկա մուտք գործելու փուլ անցնելու և տրամադրված դրամաշնորհների արդյունավետության մակարդակը բարձրացնելու նպատակով: Որպես թիրախային երկրորդ խումբ կդիտարկվեն գաղափարի և շուկա մուտք գործելու փուլում գտնվող այլ սկսնակ ընկերություններ, որոնք կբավարարեն սահմանված պահանջներին:

8. Բաղադրիչ 3. Տաղանդի ներգրավման բաղադրիչ

Հաշվի առնելով Հայաստանի աշխարհագրական դիրքը, տեղական փոքր շուկան և այլ պայմանները՝ տեխնոլոգիական համակարգի զարգացման տեսանկյունից կարևոր է առանձնահատուկ ուշադրություն դարձնել Հայաստանի և աշխարհի միջև կապերի ստեղծմանը և դեպի Հայաստան գիտելիքի ներհոսքի ապահովմանը: Այս նպատակին առաջարկվում է հասնել տաղանդի շարժունակության ծրագրերի միջոցով: Մասնավորապես, նախատեսվում է շարունակել սփյուռքահայ ձեռներեցներին թիրախավորող «Ներուժ» ծրագիրը:

«Ներուժ» ծրագիր

«Ներուժ» ծրագրի նպատակն է խթանել հայաստանյան ձեռնարկատիրական էկոհամակարգը՝ միաժամանակ նպաստելով հայրենադարձությանը և դեպի Հայաստան տաղանդի ներհոսքին: Ծրագրով նախատեսվում է աշխարհի տարբեր երկրներից հայազգի ձեռներեցներին և առաջատար մասնագետներին բաղկացած թիմերին ներգրավել՝ վերջիններիս տրամադրելով ֆինանսական և այլ բնույթի աջակցություն տեխնոլոգիական սկսնակ ընկերություններ Հայաստանում հիմնելու և զարգացնելու համար: Ծրագրի արդյունքում ակնկալվում է, մի կողմից, շահառուների համար ապահովել ձեռներեցությամբ զբաղվելու պայմաններ, զարգացնել ձեռնարկատիրական էկոհամակարգը և մյուս կողմից, նպաստել Հայաստանում սփյուռքից բարձր որակավորմամբ մասնագետների և կառավարչական տաղանդի ներգրավմանը:

9. Բաղադրիչ 4. Թեմատիկ միջոցառումների անցկացում

Հայաստանյան տեխնոլոգիական էկոհամակարգում առկա հիմնական խնդիրներից է նոր ստարտափերի ստեղծման և դրանց փոխակերպման համեմատաբար ցածր մակարդակը: Այս հիմնախնդրի լուծման նպատակով և որպես նախորդ բաղադրիչների արդյունավետությանը նպաստող օժանդակող միջոցառում նախատեսվում է իրականացնել թեմատիկ միջոցառումներ: Մասնավորապես՝

- *Թեմատիկ հաքաթոններ*՝ ուղղված Հայաստանի ներկա մարտահրավերների լուծմանը: Տարվա ընթացքում նախատեսվում է հաքաթոն, որը միտված կլինի Հայաստանում քվանտային տեխնոլոգիաների վերաբերյալ իրազեկվածության և մասնագիտական կարողությունների մակարդակի բարձրացմանը, ինչպես նաև կնպաստի միջազգային կազմակերպությունների և պետական մարմինների հետ Հայաստանի Հանրապետության հետագա համագործակցային հնարավորությունների ընդլայնմանը:
- *Ոլորտային միջոցառումների համաֆինանսավորում*՝ ուղղված ոլորտային այլ կառույցների կողմից անցկացվող միջոցառումների մասնակի ֆինանսավորմանը: Նման միջոցառումներից են «Ձեռներեցության համաշխարհային գավաթը», «Սևան ստարտափ սամիթը», «Հավք ԱԹՍ մրցույթ», որոնք առանցքային դեր ունեն հայաստանյան տեխնոլոգիական ձեռներեցության էկոհամակարգում:

10. Բաղադրիչ 5. Համագործակցություն հայկական արքեղերատորների հետ

Ծրագրի շրջանակում նախատեսվում է դրամաշնորհների տեսքով ֆինանսավորում տրամադրել արքեղերացիոն ծրագրի մասնակցած ընկերություններին, որոնց կողմից ներկայացվող արտադրանքի և (կամ) ծառայության գաղափարը կամ նախատիպը ուղղված է բարձր տեխնոլոգիաների ոլորտում նոր արժեքի ստեղծմանը և (կամ) տեխնոլոգիաների կիրառմամբ արդի խնդիրների և մարտահրավերների լուծմանը:

Դրամաշնորհային ծրագրի ընդհանուր բյուջեն կազմում է 30,000,000 (երեսուն միլիոն) ՀՀ դրամ, որը նախատեսվում է բաշխել մրցույթը հաղթահարած ընկերությունների միջև (յուրաքանչյուրին՝ մինչև 5,000,000 (հինգ միլիոն) ՀՀ դրամ):

Վերոնշյալ դրամաշնորհային մրցույթի հայտերն ընդունվելու են առցանց եղանակով. ARMEPS էլեկտրոնային համակարգի միջոցով մասնակիցը ներկայացնում է պահանջվող փաստաթղթերը և նկարագրում իր ամբողջ գաղափարը:

11. 2021-2022թթ. ընթացքում տրամադրված դրամաշնորհների մնացորդի մարում

Նախատեսվում է իրականացնել «Կորոնավիրուսի տնտեսական հետևանքների չեզոքացման 17-րդ միջոցառման», 2021 (բեկումնային բաղադրիչ) և 2022 («Գաղափարի փուլում գտնվող պրոդուկտների համար» և «Շուկա մուտք գործելու փուլում գտնվող պրոդուկտների համար») թվականների ««Գաղափարից մինչև բիզնես» դրամաշնորհներ» ծրագրերի, ինչպես նաև «Ռոբոտաշինություն և տիեզերական սարքաշինություն» ծրագրի շրջանակում տրամադրված դրամաշնորհների մնացորդների մարումները:

4. Ծրագրի սկզբունքները

12. Ծրագրի բաղադրիչների իրականացման ընթացքում հաշվի են առնվելու տարածքային համաչափության, ոլորտային զարգացման, ներառականության, թափանցիկության ու հաշվետվողականության սկզբունքները:

➤ *Տարածքային համաչափություն*

13. Տարածքային համաչափ զարգացում ապահովելու համար ծրագրի բաղադրիչների ուղղակի և անուղղակի շահառուներ կլինեն ոչ միայն Երևանի, այլ նաև ՀՀ մարզերում հիմնադրված և գործող կազմակերպությունները և քաղաքացիները:

➤ *Ոլորտային զարգացում*

14.Ծրագրի բաղադրիչներն ուղղված կլինեն տնտեսության մի շարք ոլորտներում տեխնոլոգիական առաջընթացի ապահովմանը և բարձր տեխնոլոգիաների կիրառմամբ այդ ոլորտներում արտադրողականության բարձրացմանը:

➤ *Ներառականություն և թափանցիկություն*

15.Ծրագրի բաղադրիչների շրջանակում նախագծերի, ընտրության չափանիշների մշակման և հայտերի գնահատման բոլոր փուլերում կապահովվի մասնագիտական շահագրգիռ կողմերի ներգրավվածությունը, ինչպես նաև հասարակության համար կապահովվի գործընթացի առավելագույն թափանցիկությունը:

➤ *Հաշվետվողականություն*

16.Ծրագրի շրջանակներում կիրականացվի շարունակական մոնիտորինգ՝ հաշվետվողականություն ապահովելու, ինչպես նաև ներդրումների արդյունավետության գնահատում կատարելու նպատակով:

➤ *Ծրագրի ազդեցության գնահատում*

17.Կարևորելով հարկատուների առջև հաշվետվողականության սկզբունքը՝ կատարվելու է ծրագրի բաղադրիչների արդյունքների գնահատում: Գնահատման ընթացքում հաշվի կառնվեն շահառու ընկերությունների, թիմերի և անձանց կողմից գրանցած հաջողությունները՝ արտադրանքի կամ մատուցված ծառայությունների զարգացման և շուկայում հեղինակության ձևավորման առումով:

Ծրագրի 2023 թվականի ֆինանսական միջոցների բաշխվածություն

	Ծրագրի բաղադրիչներ	Ընդհանուր բյուջե	Յուրաքանչյուր արժեք	Արդյունքային ցուցանիշ
		Հազար դրամ	Հազար դրամ	
1.	«Գաղափարից մինչև բիզնես» դրամաշնորհներ	350,000		Մինչև 66 կազմակերպություն
	Գաղափարի փուլում գտնվող պրոդյուսերների համար դրամաշնորհներ	150,000	5,000	Մինչև 40 կազմակերպություն
	Շուկա մուտք գործելու փուլում գտնվող պրոդյուսերների համար դրամաշնորհներ	200,000	10,000	Մինչև 26 կազմակերպություն
2.	Ինկուբացիոն և աքսելերացիոն հնարավորությունների ստեղծում	10,000		
	Աքսելերացիոն ծրագիր 2022	10,000	10,000	1 հաղթող կազմակերպություն
3	Տաղանդի ներգրավման ծրագիր	70,000		
	«Ներուժ» ծրագիր	70,000		Մինչև 3 կազմակերպություն
4	Թեմատիկ միջոցառումների անցկացում	10,000		
	Ոլորտային միջոցառումների համաֆինանսավորում	10,000	10,000	1 միջոցառում
5	Համագործակցություն հայկական աքսելերատորների հետ	30,000	5,000	Մինչև 6 կազմակերպություն
6	2022թ. ընթացքում կնքված դրամաշնորհային պայմանագրերի գումարների մնացորդի մարում	30,000		
	ԸՆԴԱՄԵՆԸ	500,000		